

OLE SULU SAMOA



EKALESIA FAAPOTOGA KERISIANO SAMOA
OLE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

OLE SULU SAMOA

MATI 2019

email: sulusamo@cccs.org.ws -Main Office: Ph. 24414, Ext 30 - website: www.cccs.org.ws



Faletua Matagaluega Falealili

O le Mafutaga Faafouina Faletua Toeaina, Faifeau ma Tinā Penisione i le masina o Mati i tausaga ta'itasi. Na usuia lea fono i le aso 12 - 14 Mati 2019 i le Hall a Tupulaga i Sogi.

PEPA TUPULAGA TALAVOU MATAGALUEGA HAWAII

Pepa Fono Tele 2018

Upu Amata:

Aloha! Talofa!

E fa'afeiloai atu Tupulaga Hawaii i le Fono Tele o le 2018. I lau susuga i le ta'ita'ifono male laulau-a-fono, le paia o le fa'alapotopotoga o lenei Maota Fono ma usugafono uma. Ua poto moli i le futiafu e tasi, i le ta'ita'iga

mana a le Tapa'au Sili, ua momoli mai ai lo outou soifua, ma so matou ola, i lenei taeao fou.

Malo le usufono. Malo foi le onosa'i. Faafetai ua matou maua lenei avanoa fa'a-auro e fai ai ma sui o Tupulaga o le Ekalesia. Ua matou filifili le Tusi Faitau ma le Autu o le Aso lenei i le

Tusi Faitau Aso: "Auina Atu e le Agaga – Spirit Sending." Ona ua matou lagona, ua mafa-totoga le Fono Tele i lona Autu i ē na muamua mai i lenei vaiaso. Peita'i, fai mai le upu fa'aperetania; Last, but not the least – A faa-Samoan; E mulia'i, ae sili lona taua.

Tusi Faitau:
Ioane 20:19-23

(faaauau itulau 5)

O LE LAUGA

SALAMO 115: 1 – 9

TANIELU 4

MATUA: Salamo 115: 1

“Aua lava ne’i ia te’i matou, le Alii e, ‘aua nei ia te’i matou, a ia tu’uina atu le viiga i lou suafa ona o lou alofa ma lou faamaoni.”

Manatu Autu: E LĒ O I TATOU A’O LE ATUA.

Tasi a lea vaivaiga o lo’o toilalo ai pea le tagata ola. O le poto male malosi ma le tamaoaiga foi o loo ia te ia, o lona lava lea na maua i lona filiga ma lona taumafaiga e ala i lou atamai ma lona malosi. Ae silimusia nisi o i latou ua maualuga le tulaga i galuega, tulai mai ina taitaia ni Matagaluega po’o ua fa’aeaina ini Suafa Taualoa i aiga i nuu ma le ekalesia na tupu le faamaualuga ua faafefeteina, ma faapea o a’u lava lea, Pei ole tala ia Nepukanesa le tupu o Papelonias. (Tan 4) Na faaaogaina e le Atua e fai ma ana mea faitaulaga, ua faaeaina mo le lalolagi, foai iai le mamalu, o lona malo o le malo o le faavavau, o lana pule e au tupulaga lea. O le’o le mea ua iloa – ua ia faapea ane. “E le o Papelonias tele ea lenei, na au faia i lou malosi tele lava, e fai ma fale o le malo, ia viia ai foi lou mamalu?” Ua fa’aeaina, talofa ua le iloa lē na aumaia le malosi male mamalu ua maualuga ai. Ua

faatoilaloina ma olopalaina, ua tulieseia mai tagata, ua ai foi o ia i mutia pei o povia susu lona tino i le sau mai le lagi, ua tutupu lona ulu ma ona matiuu ma atigivae e pei o manu felelei, le uiga o le tagata faamaualuga i le Atua, ua manao o ia lava ua manuia ai fai mai le fai-Salamo, ‘aua lava ne’i ia te i matou, a ia tu’uina atu le viiga i lou Suafa ona o lou alofa ma lou faamaoni.”

suafa ona o lou alofa ma lou faamaoni. ‘Aua nei o tatou fesili, poo fea o iai le Atua?

O loo lotolotoi le Atua ma le Ekalesia, oloo faatasi ma i tatou. Ia le Ekalesia e, ua e poto, ua e mamalu; ‘aua lava ne’i o ta faapea ane, o tatou lava a ia tatou faapea ifo, pei ona fai mai le fai Salamo. “Aua ne’i ia te i matou le Alii e, ‘aua lava nei a tei matou, a ia tuuina atu le viiga i lou suafa, ona o lou alofa ma lou faamaoni. **E LĒ O I TATOU A’O LE ATUA.**

Ao le mea sili ona taua, o loo iai le avanoa ua tu’uina iai e le Atua ia Nepukanesa, ia Silafia ma e iloa o loo iai i le pule silisili ese “Le oi le lagi” o loo iai lona avanoa e lafoai agasala ae fai le amiontonu, seja mavae le fitu tausaga. E tu’uavanoa le Atua, o lona alofa lava lea e silisili lava.

O sa’afiafiga na o le fai Salamo faa-le fatu pese Eperu. ‘Aua lava ne’i faapeainia le tagata o lona malosi ma lona poto ua faaeaina ai; e le o tatou a’o le Atua.

O mea uma ua maua e le tagata o fa’amanuiaga mai le Atua. O mea uma ua faamuamua i o tatou loto ma fai lava lea ma tupua ua o tatou faatuatua iai, o mea pepē e leai se ola.

Le Ekalesia e, ia tatou faapea ane lava, ‘Aua lava ne’i ia te i matou le Alii e, ‘aua lava ne’i ia te i matou, a ia tuuina atu le viiga i lou

Le Atua le na alofa mai i le lalolagi na aumai ai lona atalii e to’atasi ina ia le fano se tasi faatuatua ia te ia, ia maua le ola e faavavau.

Lea ua alu la ta folaua i lenei tausaga fou 2019, e tele faigata ta te fetaiai le Ekalesia e, ia pipii i le vaa, o le Atua lea, o le Tautai matapalapala, e taunu ai manuia ai la ta folaua.

E le o i tatou, ao le Atua. AMENE.

Saunia:

Malo Afia (FS)

EFKS Aufaga

Matagaluega Lepa-Lotofaga-Aleipata.

Titus 2:11
For the grace of God has appeared that offers salvation to all people

LAUGA,

ASO SA TUPULAGA EFKS

27 Ianuari 2019

Feagaiga Tuai:

Salamo 140: 1 – 13

Feagaiga Fou:

Roma 8: 33 – 39.

Matua: Salamo 140: 12.

“Ua ou iloa e faia e le Alii le finauga mo e puapuagatia, o le faamasinoga o e ua matitiva.” Roma 8: 38-39, Auā ua ou mautinoa, e le mafaia..e ia mea ona faate’ā’eseina mai i tatou i le alofa o le Atua, o loo ia Keriso Iesu lo tatou Alii.”

Manatu Autu o le Aso Sa o Tupulaga:

“O le Tausiga a le Atua.”

Ua amata ai i le Aso Sa nei le 2 vaiaso o le faasologa o le Manatu Aoao faapea, ‘Maimoa Mai a le Tusi Paia’. (The Bible at the movies). Pe faapea foi, O le Tusi Paia i Maimoaga fa’ā ata tifaga.

O le faasologa masani o ata tifaga - o le tama ma lana vaega e autū ai. E vatau ma le sifi ma lana foi kegi leaga. E muamua faatupu lo tatou faanoanoa ma le ita, i vaaiga mata’utia o faiga sauā ma le faasaolo a le sifi, i nai tagata e vaivai ma puapuagatia. Ae mulimuli ane i le faai’uga o le ata, ona faaumati a lea o ia tagata leaga uma, ina ua fai e le tama autū le faaolataga. E tu’ua fiafia le tifaga, ina ua faatoilalo le leaga, ae manumalo le lelei. E manumalo ma fiafia, o le tausiga a le Atua mo ona tagata.

E faapea le tulaga o loo taoto ai le Salamo e 140. O le tatalo a Tavita o loo amata mai i le lagiina o ona puapuaga, ina o tafili saunoa tagata leaga e faatigaina ia te ia. O loo faamatala i parakalafa muamua e

4 sauaga a tagata ia Tavita; ae faai’u i le parakalafa mulimuli, i le olioli, ina ua molimau ma le mautinoa Tavita, i le moni o le alofa ma le tausiga agalelei a le Atua ua faasaoina mai ai o ia.

E matafelefele foliga o sauaga ma faiga lē alofa a tagata leaga ia Tavita. Ma e lē faapito foi i se to’atasi le sifi poo le fili na feagai ma ia.

Auā mai lava i lona talavou, na amata mai i totonus o lona lava aiga, le agaleaga ia te ia. Na inosia ma tuulafoa’iina o ia e ona uso, na ala ai ona tuu e leoleo le lafu mamoe, o le tiute e maulalo ma palapala. O le faamoemoe maualuga o le au uso matutua, ia taasē ma leiloa ai Tavita i le vao, pe fasia e ni faomea, ia pa’ū i se vanu, pe ‘aina ai e manu feai.

Ui i lea, na liliu ma fa’aaogā e le Atua le si’osi’omaga o fili ma manu feai, le nofoaga lauleaga, le natura taaligoligoa ma le pogisa, e tapena ai le Tavita talavou mo lona valaaufina a taeao.

Tupulaga e o Samoa, mata e faatauvaa le tulaga o loo tuu ai nei oe, i lau tuatua i lou aiga ma lou nuu; i le i’uga o a’oga o lena tausaga, i totonus o galuega, tainane foi le feagai ma faasalaga. E te manatu o loo si’omia oe, ua pei se mamoe i le va o luko. Ae o iina e tapena ai oe e le Atua mo lou lumana’i. Pe a e talitonu ma faalagolago tasi i le tausiga a le Atua, pei ona fai e le talavou Peteleema.

Ua faasolo ina matua le leoleo mamoe, ua amata foi ona iloga mai mea na te faia. E pei o lona fasiotia o le toa malosi o Koliata, na pepese ai fafine, *Ua fasia e Tavita lana*

sefulu o afe, a o Saulo na o le tasi le afe.

Ua avea le tausa’afia o Tavita, na tupu ai le fefe, popole ma le lotovale o le tupu o Saulo. Ua amata ona faufau e le tupu ana togafiti leaga, ma faata’oto matasele o ana mailei, ia lavea, pe manu’ a pe oti ai le taule’ale’ a tautua matavela.

Ua tofi e Saulo e fai ma ta’ita’i ‘au. Ae tutusa lona faamoemoe ma le fanau matutua a Iese - ia fasia ai Tavita ma oti ai.

Ae le’i afaina le tama e mata’u i le Atua. Na saogalemu pea, auā sa le’i aunoa, ona faasaga a’e ona mata i mauga, e oo mai ai lona fesoasoani. E le’i tuulafoa’i o ia e le tausiga a le Atua, auā na talitonu e lelei ona vivii atu i le Alii, ma fai pesega i lona suafa Silisili ese. Na ia ta’u atu i le taeao lona alofa, na ia ta’u atu foi i le po lona faamaoni. O le puna lea o lona malosi ma le saogalemu – o lona to’aga e fai le lotu, e fai pesega, ma tatalo i taimi uma. *‘O oe lava lo’u Atua, le Alii e, o lo’u faaolataga malosi, ua fai oe ma talipupuni o lo’u ulu..’*

Ua faasolo taualumaga o le nofoaiga a Saulo, o se faigamalo e fai fua, ae pei o se la’au e tu ae ua oia. Ua saeia ese le malo mai ia te ia, ona ua ia soona fa’aaogā sesē lona tofi ma lona tulaga ta’ita’i, e faamalie ai lona mana’o, ae tu’ulafoa’i le finagalo o le Atua.

O lena ua silafia, agasala ogaoga e 2 na fai e Saulo. Muamua, o lona lē popoi osi le taulaga paia e lē o sana matafaioi. Ma lona lua, o lona lē usita’i lona lē faalogo, i Afioga a le Atua tauala mai i lana auauna ositaulaga o Samuelu. Na fai lona lava fia atamai, lona fai paaga ma tagata ese faapaupau o Amaleka, ma le tu’inanau i le tamaoaiga. Na ala ai ona saei ese le malo mai ia te ia.

E tuuafaafeagai le faiifo o Saulo, ma le tupuola lauusiusi o le tausa’afia

o Tavita i loto o tagata, o le soifua ua logo mālie i le silafaga ma le faafogofaga a le Atua.

E mata'utia le tulaga e oo i ai le ma'ema'e o le tagata pei o Saulo. Le ta'ita'i o ti'eti'e mai i luga, i le pule ma le paoa, ae ua lē toe fia alu ifo, o ai a toe fia alu ese? Ua na fai so'o se ituaiga auala, ina ia mautū lona nofo ai pea, ma fa'aauau ai lana pule sauā. A uma ia, faasolo atu i ai ana fanau totino, o isi tagata uma e lava i le pati ma le po. O le eleele lē malie i vai, le galala i le fia taumafa pea lava pea i le paoa.

E lē faatauagavale i atina'e lelei na fai e Saulo mo le manuia o Isaraelu. O tiute tau'ave o soo se ta'ita'i. Ae aumā ia galuega, pe a faatusatusa i le ogaoga o faiga pi'opi'o ma faiga solitulafono ua sasao fa'aafi, ma fai pupula i luma o tagatanuu!

E molimau le tala faasolopito o le lalolagi e oo mai nei, i ta'ita'i pei o Saulo. Ta'ita'i o aiga ma nuu, malo ma faalapotopotoga. O i latou nei e ta'ua o sifi, o tagata leaga o le tifaga.

O le mea mata'utia ua oo ia Saulo, ua lē iloa faavasega le eseesega o mea lelei mai le mea leaga, le sa'o mai le sesē. O mea valea, mea faatupu mala ma inosia, ua fai mana vaisū. A o mea tau le Atua e maua ai le ola faaleagaga, ua tauaso ai lana vaai, ma tutuli ai ona taliga. O faailoga o le tagata ua afio ese ai le Agaga Paia sa lima ta'ita'iina lana faatautaiga.

Ua na lē iloa foi le eseesega o tagata - o le tagata lautele mai le tagata ua faapa'iaina, o e na totofi faapitoa e le Atua, mo le tapuaiga a Iutaia i le Alii le Atua o 'Au. O le faavae o Isaraelu, e lē fataaulia le ituaiga o Levi, mai le nofo a to'o o le fanauga a Iakopo. E 12 ituaiga e fai i ai le pule ma saofaga a le malo mo atina'e manuia o le olaga masani i la le tino. A o ositaulaga, le 'au sa Levī, ua vavae ese, ua

faapa'ia mo le Atua ma le galuega o le ola faaleagaga. O faamanuiaga latou te maua, e lē toe aiā i ai le pule a le tupu ma le faigamalo. O mea ua faapa'ia ma kopano mo le Atua.

I le mafaufau o Saulo, ua leai se eseesega. Pe ositaulaga pe fai pisinisi, pe faomea, ua laina tutusa uma. O le papa'u lea ma le faapaupau, ua goto ifo i ai le faatofala'iga a le ta'ita'i, ua aunoa ma le Agaga o le Atua.

Talofa ia Aimeleka ma le aai o ositaulaga i Nove, na latou fesoasoani ia Tavita a o fesulufa'i solo. E le'i poi ai le atalii o Kiso. Na ia aami ma fai le faamasinoga o ositaulaga. Ma o Saulo lava le faamasino, o ia foi le loia. O le i'uga o lea faamasinoga, e 'au'au faatasi ia oti ositaulaga.

Na faatonu e Saulo ana auauna e fa'ao'o le sala, ae le'i usita'i tagata nuu moni o Isaraelu, e fefefe ma matata'u – e lē pa'i se lima i ositaulaga, o sui vaaia o le Atua i le lalolagi. O ai a ti'eti'e i ai mala, e tutupu mulimuli mai? E le'i suaia i le faai'uga, leaga ua tafatasi ma taga tutusa le loto o le tagata, ma le mana'o o le sifi o sifi, le tiapolo. O le ita faamoemoe, o le taui ma sui. Alē oti Tavita, ia oti lana vaega, ia soloia le itu o agaia o ia, ae nofo ai pea o ia e tafili saunoa i le nofoalii o tu'inanau.

E lē o toe popole foi Saulo, pe afai e 'au ese Isaraelu mai ia te ia. E lē afaina, lea e i ai Toeka le Etoma. Ua i ai tagata o nuu ese, tusa pe faapaupau ae lima malosi, e tapa tute; ua latou fai paaga, ma 'au'au faatasi e fai lona mana'o leaga. Na fasioti i le pelu i lea aso, o ositaulaga e 85, o e na oofu i efota o 'ie lino. Faasolo atu i Nove o le aai o ositaulaga, ua fasioti tane ma fafine, tamaiti atoa ma tama meamea, e oo i lafu manu. E muliga le leo na lagona i Rama, i le uega lea na faalogoina i Nove.

Ua lagona nei lea lava leo, i Tumua ma Pule, Ituau ma Alataua, Aiga i le Tai ma le Vaa o Fonoti. Ua lagona i le Ekalesia Faapotopotoga Kerisiano i Samoa. Auā e leai se eseesega, o le fasioti o ositaulaga a le Atua, ma le fa'ae'e i ai o tulafono mamafa, ia totogi a latou lafoga. Ua e saisai, ua molia, ma fa'atasina i ala i fa'amasinoga.

Ua lē gata i lea, ae ua e fa'ae'e i ai le mamafa o lau saunoa ma lau fetalai, o tu'uaiga sesē, o upu fa'alumaluma, o upu fa'atausuai ma upu fa'atauemu i le au ositaulaga Porotesano.

Ua mamafa ma matuitui lou so'ona aiā i upufai o le EFKS ma soli ana faiga faavae – e pei o le sailiga o ana faifeau osi fegaiga. O le tofiga e filifili e ona tagata Ekalesia ma ona tagata lotu, i totonu o ona malumalu, ae lē faia i Aso Gafua a matai lotu ese, i maota ma laoa o afioaga.

E talafeagai lava pe afai o se faiga lea faa Penetekoso, poo le faa Katoliko, poo se isi ituaiga, i a latou ositaulaga. Ae lē faapea le faavae ma faiga faa-EFKS, ua uma ona fai e o matou augatamā, ua lagomau mai ti'asā.

Ua tu'ufa'afeagai le amio leaga a Saulo, ma Tavita ua tumu i le Agaga Paia. Na maua e Tavita avanoa e fasioti ai le sifi i totonu o ana. A o le ta'utinoga a le tama autū, '*Ia faamamao e le Alii ia te a'u, ina ne'i faaoo lo'u lima i lē ua fa'au'uina e le Alii.*'

E mafai ona finau mai Saulo, o ia e autū i ai le tala faasolo i lea lava augatupulaga o Isaraelu. O loo fulisia ia te ia le to'atele o faipule ma le vaega'au.

Peita'i o lena fulisia, ma lena lagolago to'atele, o loo fai i luga o le fefe ma le mata'u, ae lē o se alofa moni. Taimi ia i Isaraelu, ua sili atu le fefefe o tagata ia Saulo, nai lo le matata'u i le Atua. O le a le poloaiga ma le faatonuga a le

tupu, e ioe tagata uma. Ua aunoa se isi e lototele e tautala atu se upu e tete'e pe agaia ai le mana'o o le tupu. Vaganā ai le tupu faaoolioli, o loo 'ai tau malele solo i le vao. Aiseā le fefe? Aiseā le sāō ma le gūgū? Auā e aveese ai tofi maualuluga, e lē toe maua faamanuiaiga. E tuu ai oe i vaimata o le tupu, pe a e tofotofa faaleo sou tete'e. Ua leai a se isi si'ufofoga ese e toe faalogoina, vaganā lona lava leo ua faatalutaluā i le taeao, aoauli, afiafi ma le po. Ua na fufulu faamamā atoa (brainwash) mafaufau o tagata uma i ana saunoaga.

E te fesili ifo Samoa i lau faamasinoga, pe lē faapea le tulaga ua i ai nei lou soifua? I totonu o lou aiga ma lou nuu, ae a lou atunu ma lana faigamalo?

Talosia, e lē o faapea i le au ositaulaga o folafola le Tala Lelei. I le FES ma soo se fata faitaulaga. O le tatalo, ia 'aua le fefe e ta'u atu le finagalo paia o le Atua. 'Aua e te popole ne'i e mativa ai i le tausiga a tagata, poo a sauaga e tutupu mai ai. E lē tu'ulafoaiina e le Atua ma lana tausiga ona tagata.

"Ua ou iloa e faia e le Alii le finauga mo e puapuagatia, o le faamasinoga o e ua matitiva."

O le finauga a le Atua e faavae i le alofa ma le faamaoni, mo e vaivai ma lē taualoa. O ana faamasinoga e faamuamua e matitiva ma e tuulafoa'iina. O ana faai'uga e sa'o ma lelei, e fa'aalia i lona lava taimi, i ana lava auala e finagalo ai o Ia.

Le atunu pele Samoa ma lau faafofoga, o le tatalo lea a le Tala Lelei i lenei Aso Sa faapitoa mo au Tupulaga. E lē mavae le tausiga a le Atua mo oe. O a faafatiatama'i ma to'atuga o le taimi nei, i faiga sauā a Satani ma ana 'au, ia loto tetele ma faatuatua. O la e aposetolo, 'e lē mafaia e ia mea ona faatea'eseina mai i tatou i le alofa o le Atua, o loo ia Keriso Iesu lo tatou Alii.'

Mo tupulaga, o outou o ta'ita'i faaoolioli o aiga, nuu, ma le malo, ae maise o lau EFKS a taeao. 'Aua ne'i outou fia tama leaga faata'ita'i fua ia faiga faa Saulo. E i'uvale, e lē taunu i se manuia. Na maliu fasia ma oti matagā i luga o Kilepoa.

Ia tulimata'i ma fa'aa'oa'o i amio lelei ma amio pulea a Tavita. Ae ia sili ona tatou mulimuli i tulaga 'a'ao o le Alo o Tavita – o Iesu Keriso lo tatou Alii Faaola. Na muamua feagai ma tiga, ae mulimuli mai

lona manumalo. Na amata i lona usita'i ma faamaulalo, ae taualuga i lona fa'aeaina.

Tatou fiafia, ua mate le sifi. Ua fasia Satani ma ana 'au. Ua tatou manumalo a'ia'i i nei mea uma, e ala i le maliu tiga o Iesu i le satauro, o lona toetu manumalo, ua afio a'e i le Lagi, o loo nofo i le itu taumatau o le Atua le Tamā, o loo fautua mo tatou, ma o loo pule e faavavau, faavavau lava.

Ia ia te ia le viiga. Ia manuia Tupulaga uma o Samoa. Amene.

Ja silafia, o le Sauniga faapitoa mo le Aso Sa o Tupulaga o le Ekalesia 2019, na faia e le Matagaluega Faasaleleaga i le Pulega Salega, i le Malumalu EFKS Taga.

*Ta'ita'i Sauniga & Lauga
Faitoaga Tolua FS*

Faitauina F. Tuai

Etelini Leumu'ava, Fagafau

Faitauina F. Fou

Paepae Pulemau, Foailalo

Tatalo Faafetai

Ruta Loli, Vaipu'a

Tatalo Faatoesega

Pu'a Sasa, Fai'a'ai

Tatalo Mana'ooga

Milo Nikisone, Fogatuli

Aufaipese

Tupulaga EFKS Taga.

PEPA TUPULAGA TALAVOU MATAGALUEGA HAWAII

Pepa Fono Tele 2018

Ua oo i le afiafi o lena aso, o le uluā aso lea ole vaisapati, ua punitia faitotoa o le mea na potopoto ai le au so'o, ona o le fefe ia Iutaia; ua maliu atu Iesu, ua tu i totonu; ona fetalai atu lea o ia ia te i latou, "Ia outou manuia." Ua ia fetalai atu lea mea, ona faali atu lea ia te i latou ona lima ma lona itu. Ona olioli ai lea o le au so'o ina ua latou vaai atu i le Alii. Ona toe fetalai atu lea o Iesu ia te i latou, "Ia outou manuia. Faapei ona auina mai o a'u e le Tama, e faapei foi ona ou aauina atu outou." Ua ia

fetalai atu lea mea, ona manava atu lea o ia ia te i latou ma faapea atu, "Ia outou talia le Agaga Paia. O i latou uma lava tou te fa'amagaloina ai a latou agsala, e fa'amagaloina ia ia i latou; o i latou uma lava tou te tuu pea i ai a latou agasala, e tuu pea lava ia."

Manatu 1: "ua punitia faitotoa o le mea na potopoto ai le au so'o, ona o le fefe ia Iutaia;"

O le tala a Ioane e uiga i le Aso o le Toetu, ua ta'ua ai uiga nei o le au so'o. O le faailoga o le fememea'i auā ua leai so latou ta'ita'i, ma le lē mauttonu i lenei tala ua au mai e uiga i lona toetu. 'Ai lava sa i ai ni o latou lagona, o le a faapefea nei ona latou toe faafesagai ma Iesu? O le a sa latou tala o le a fai atu, auā na latou sosola a'e tuua o ia e fa'asatauroina? A tupu le fefe ma le palaai i se tagata, ua leiloa foi ni upu e gagana ai, ma taumafai loa ina ia lafi lilo.

E taua tele le Gagana tautala: e feso'ota'i i tatou ole tasi i le isi; ma fa'aleoina ai manatu ma mafaufauga loloto. O le Gagana Samoa lea ua mafai

(faaauau itulau 13)

FONOTAGA AU TAUMAFAI

KERISIANO O LE

LALOLAGI.

O le Fonotaga lona 28 lenei a Au taumafai Kerisiano a le lalolagi sa usuia i le aai o Kalefonia o San Diego i Amerika mai le aso 24 – 29 o le masina o Iulai 2018. E aveatu malu i puega ona o le tuai ona tuuina atu se fa’amatalaga o lenei fono, ona o le tau fa’asoasoaina o lomiga ole Sulu Samoa.

Mo le silafia e le Eklesia, o fonotaga nei a Au Taumafai o le lalolagi, e tai 4 tausaga ma fai. O le atunu e fai ai, e tauofo mai lava atunu o loo fai ma sui o le Sosaiete a Au Taumafai o le lalolagi. O le fonotaga talu ai nei, o le ofo a le Eklesia Faapotopotoga i Amerika Samoa. Talu ai le faigata o le malaga mai o Au - Taumafai i Tutuila mai itu e fia o le lalolagi, faatasi ai ma le vaapiapi o Tutuila, o lea na manatu ai le Eklesia i Amerika Samoa, e fa’ataunuu pea le latou ofo, ae o le a fai i le aai o San Diego i Kalefonia i Amerika e lelei e telē toe faigofie mo femalagaiga, ae talimalo ai lava le Eklesia a Amerika Samoa.

O le tala ototo lenei o lea fono e pei ona auai atu iai sui o la tatou Sosaiete Au Taumafai. E to’ a sefulu tolu le aofa’i o ē sa auai i le fono, o sui mai Matagaluega a Ausetalia, o Niu Sila, Amerika ma Samoa. Mo le silafia, e tusa ai ma le iugafono a le Fonotele, e to’ a 5 sui o Matagaluega fa’atasi ma le laulau a fono o le Komiti, e totogi e le Au Taumafai o latou pasese, ae o isi sui e auai e totogi lava o latou pasese. Talu ai ona e eseese atunu na malaga mai ai a tatou usufono, e eseese foi taimi o

vaalele, o lea na eseese ai foi aso na taunu ai i Amerika. Na taunu nisi i le Aso Toonai, o nisi i le Aso Sa, a’o isi o le Aso Gafua. Sa fa’amautū le to’atele i le maota o le susuga i le faifeau Toeaina o Andy Leavasa ma le faletua e fa’atali ai le to’atele ona malaga faatasi ai lea i lalo i San Diego. Na taunu uma sui i le aso Gafua, ma sa fa’atino foi le tali lumafale e le Susuga i le Toeaina, ma le paia o le Pulega Amerika Tutotonu, ma le tamā Penisione ia Liki Tiatia, e ala i le ava o le feiloaiga. Faafetai le fa’aloalo ma le fa’atupu. Na tuua Kalefonia i le taeao o le aso Lua, ae fai malaga atu loa i San Diego i le pasi. E tusa e 2½ itula le umi o le malaga, faafetai na malaga, ae le’i pisi le auala.

Sa taunu le matou malaga i se tasi o aulotu a Amerika Samoa, o loo galue ai le Susuga i le Toeaina o Suitulaga, auā o iina o loo fa’amautu iai usufono. Na uma le malu taeao, ona faasino lea o motels auā apitaga o le au usufono, ma mapu atu iai mo se malologa, ona faatoa toe feiloai i le afiafi o lena aso, e amata aloaia ai le Fonotaga.

E 26 le aofa’i o atunu sa auai i le Fonotaga. Mo le silafia, e lima itulagi e vaevaeina iai Au Taumafai o le lalolagi.

(1) Europa: e ao fia ai Switzerland, Ireland, Romania, Hungary, Germany ma Netherlands (7)

(2) Itulagi Aferika: Nigeria, Zambia, Ghana, Sierra Leone, Kenya – e 5 atunu.

(3) Itulagi Amerika ma Amerika Saute: E iai USA, Canada, Mexico, Peru, Jamaica e 5 atunu.

(4) Itulagi o le atu Asia: Initia, Pakistan, Lebanon Korea i Saute, e fa (4) atunu.

(5) Itulagi o Ausetalia ma le Pasefika: E iai Ausetalia, Hawaii, Samoa, Tutuila, Solomona, Tonga ma Fiti. E lei usufono ni sui o Tonga ma Fiti.

Ma nei atunu e 26 sa auai, pe a ma le 400 le aofa’i o ē sa usufono, auā e amata mai lava i le to’atasi le sui usufono mai se atunu, e o’o atu lava i le ta’i 70 pe o le 80 foi nisi.

O le manatu autu o lenei Fonotaga o le “OPEN”. O lona agaga i le faa-Samoa ole fa’avanoa lea o le loto o le tagata e afio ai Iesu ma maua ai le malosi ma le fiafia o le tagata e tatala atu ai e ia, ia lava e faasalalau atu le Tala Lelei i isi ona uso a tagata. Na afua lenei autu mai le talitonuga; “**EAVANOA PEA LE ATUA E FA’AAOGA LANA TAGATA.**” E taua le tagata i le Atua mo lana galuega, e ui ina agasala ma faatauvaa.

O polokalame o aso ta’itasi, mai le Aso Lulu e o’o atu i le Aso Toonai; e amata lava i le mafutaga tatalo, mai le 7.00am e oo i le 8.00am. Ona sosoo ai lea ma le malu taeao, mai le 8.00 e oo atu i le 9.00 am. O suesuega o le Tusi Paia mai le 9.00am e tau i le 11.00am, ma e vaevae i vaega. E iai mataupu fa’apitoa e filifili lava e le tagata; e pei o le “Arts of Leadership Training, Learning Music; Relevancy of Christian Endeavour to Everyday life; “the art of Preaching”. O polokalame na, e fai mai le 11.00, e oo atu i le 1.00pm. Ona sosoo ai lea ma le lunch i le 1.00 i le 2.00pm.

O le taimi o le aoauli mai le 3.00pm i le 4.00pm e toe fa'aauau ai fetufaaiga i auala e faaolaola atili ai le galuega faa le Au Taumafai i totonu o Ekalesia. Sa tele ona fa'aaoga usufono Samoa e fesoasoani atu, auā o lea ua ola ma mautu le Au Taumafai i totonu o a tatou Ekalesia. Ae o le tele o atunu, e foliga faatoa tau fa'aolaola le Au Taumafai.

O polokalame i afiafi o Aso ta'itasi mai le 7.00pm i le 10.00pm, e fai ai pepa a foma'i o le Mataupu Silisili mai atunu eseese. Pe tasi le itula e fai ai ona tuu lea o avanoa i atunu ta'itasi mo a latou fa'atinoga i ni pese po'o ni siva (Presentation).

O le tamaoaiga mai le Tusi Paia sa maua mai pepa eseese na saunia - o se oso lelei lea mo ē sa usufono, aemaise lava i latou ua malamalama i le Mataupu Silisili. I taimi o fa'atalatalanoaga o mataupu i taeao ma aoauli, o itu lelei sa matauina, o le fa'aaoga o tama ma teine talavou e ta'ita'i fa'atalatalanoaga i totonu o vaega. O le to'atele o nei tupulaga ua iu mai univesite, ae matua fiafia lava i le Tusi Paia.

O nisi foi o i latou nei, e tofu ma agavaa e pei o le faakamuta, o le fai eletise, ole palama, ma le kuka. O i latou nei ua latou fa'avaeina ni sosaiete e fesoasoani i aiga, o ni aulotu e fia faia ni fale fou, po'o le toe fa'aleleia foi o ni fale tuai. A faapea e talosaga se aulotu mole fausiaina o se fale e oo lava i fale - sa, ona o foi lea o ia sosaiete e fai sailiga tupe mo se fale, a iloa loa ua lava, ona o mai loa lea ua fai se galuega, e matua leai lava ma se tupe a lē e ana le galuega e alu ai. Sa ou talanoa i le ta'ita'i o lea vaega, o loo nonofo i Amerika, pe mafai ona o mai i Samoa e fai se fale o

aulotu, fai mai le tala a le ta'ita'i o lea vaega; e mafai ona o mai i Samoa. Ae e tatau ona talosaga atu, aveatu ma le tau o le galuega ona galulue muamua lea e fai auala e saili ai mea e fai ai le galuega , a iloa loa ua lava mea e manaomia, ona o mai loa lea i Samoa. Fai mai le ta'ita'i, ua tele a latou galuega ua faia i Aferika ma Initia atoa ai foi ma totonu o Amerika. E taua lea sosaiete o le **"Voluntary Mission Week."** I taimi o fa'atalatalanoaga i ni auala e saga fa'aolaola ai le Au Taumafai Kerisiano. Sa lagā ai se fesili – *"Pe le tatau ona tapena mataupu a le Au Taumafai i taimi o Fono, ina ia aofia ai tagata uma."* O le uiga o le fa'a-fesili. E tatau ona tapena pepa o le fono mo tupulaga talavou, ia iai foi ni pepa mo le au-matutua. Sa lagalenei manatu, ona o nisi atunu e taua le galulue faatasi o le au talavou ma le au matutua. E pei o Samoa, e fesoasoani le au matutua i le au talavou, ma e amanaia foi e le au matutua manatu ma lagona o au talavou. O le taua o le au matutua e faamalosiau i tupulaga e atia'e, e tauivi ma ola ia Keriso. O lea ua logosaia e le fono manatu ma lagona o le au fono. I taimi o fonotaga, a sauni loa mo fono, e tatau ona saunia pepa i le tulaga o Au Talavou, ae tapena foi ma ni pepa aua le au matutua. Ua maitauina i taimi o fono, nao le fia momoe o le au-matutua i taimi o pepa, ona e faatatau i au talavou. Sa iai taimi sa fesiligia ai e le fono, sui usufono e o mai i atunu o lo'o vevesi ma fetaua'i-pe o le a se tulaga i soifuaga o tagata; e pei o le malo o Suria, Lepanona ma Rusia. O le tali a sui usufono mai nei atunu, fai mai i latou, e moni ma fa'amaoni – e le o ola filemu tagata, ae talu ai o latou atunu o

atunu tetele, a tupu vevesi ua na o se vaega o le atunu. E atamamai foi o latou atunu, auā e ta'u ta'ua i nofoaga e pei o le toafa, ma tuaoi ae aloalo mamao lava ma nofoaga o loo iai le puna o lo latou tamaoaiga. E pei la o Suria ma Lepanona, e mamao lava nofoaga o loo tau ai taua, mai nofoaga o loo maua ai le suau'u, po'o nofoaga foi o loo lolofi atu iai turisi. E leai lava ni turisi o loo afaina i taua o loo faia nei, e ala lava ona lavea le turisi o le alu i le nofoaga o loo papa ai pomu. E pei foi o Isaraelu, e vevesi lava Palesitina ma Isaraelu i luga o tuaoi, ma luga o le toafa, a'o nofoaga lava e pei ona taua i le Tusi Paia, e le o afaina, e aloalo mamao lava nei atunu ma nofoaga ia, auā o turisi o le ala numera tasi lea o tupe maua a nei atunu.

Fai mai foi tala a ususfono ma ia atunu, e iloagofie lava nofoaga e iai Mosilemu, o iina o loo tele ai le vevesi. E faasagatau Mosilemu i le lotu Kerisiano, toe fetaua'i lava Mosilemu latou ia. Mo le silafia e le au faitau, o le Peresitene o le Au Taumafai o le Lalolagi o loo iai nei o le tagata Lepanona. E ui ina vevesi Lepanona, ae o loo iai pea le au-kerisiano o loo taulogologo le tala ia Iesu Keriso.

Sa fesiligia foi usufono mai Samoa; pe aisea o loo olaola ai pea le Au Taumafai, e le gata i le EFKS a'o le EFKAS. Sa faamatala iai, ona o Au Taumafai Kerisiano Samoa, e i lalo o le faamalu o Ekalesia Aoao. O le aofai lava o tagata lotu o ia Ekalesia, o le aofai foi lena o Sui Au Taumafai.

Sa oo i le taimi o faiga palota, mo le sailiga o sui mo le

(faaauau itulau 8)

FONOTAGA AU TAUMAFAI

KERISIANO O LE

LALOLAGI.

Komiti Faafoe, e 15 le aofa'i o sui e palota mai atunu'u o loo fai ma sui o le lalolagi. Sa ave ai suafa o Taeipo Malifa (FT), Uaea Isaraelu (FS) ma Siolo Tauati (FT). E sau le faaiuga ua toe filifilia ai Siolo Tauati i le Komiti Faafoe. Masalo ole toatele o atunuua latou iloa Siolo auā ua leva i le Au Taumafai. Ia viia le Atua. Ua tulai mai le Peresitene o le Au Taumafai a Hawaii, e fai ma Peresitene o le tatou fa'aitulagi lenei a Ausetalia ma le Pasefika mo le isi fa tausaga.

O le Peresitene Aoao o Au Taumafai o le lalolagi ua tula'i mai ai le Lepanona e sui i le Toeaina mai Romania sa Peresitene. O loo tumau pea le tofi Failautusi o le Aoao i le Fomai o le Tusi Paia mai Amerika.

Sa iai taimi sa alu ai le Matamataga a le fono i nisi o vaega o San Diego. Mo le silafia, o le aai lenei o San Diego, o le isi lea aai taua ia Amerika mo lana fuavaa o fitafita o Sami (Navy Base). O San Diego e fausia ai vaalele tau mo le Navy, e fausia ai foi vaa-tau i luga o le Sami.

E iai le vaa sa fa'aaoga e le Navy a Amerika i le taua ma Iraq. Ua le o toe fa'aaogaina nei lena vaa, ae ua fai ma mata'aga. Se o le mea ese le mea, masalo pe faaopoopo faatasi ni malae lakapi se lua ona maua lea o le tele o lea vaa; aua e le gata e fai faamalaevalele, ae ave iai foi ma sose ituiga mea fa'atonutonu alualu mamao, fa'atasi ma le faitau fia afe o fitafita e malaga ai luga. Sa matou o i le tuaoi o Amerika ma Mexico. O le itu na ofo ai le

loto, e tuaoi Amerika ma Mexico i pa uaea maualuluga toe tele, e te vaai atu lava i le faitau afe ma afe o tagata o loo i le isi itu e fa'atalitali avanoa e sola fa'amalosi mai ai i eleele o Amerika. Afai e lelei lou tusifolau Amerika, poo se isi foi atunuua e ese mai ai tagata nuu mai South America, e mafai lava ona e alu i Mexico ma toe foi ane i Amerika, o le mafuaaga lena na faigofie ai ma saoloto ona feafioai ai le Afioga i le tiakono o Taefu Salapu Asalele. Mo le silafia nao le tamā lava o Taefu Salapu le sui tiakono sa usufaono i le fono i San Diego. Matou te o ese ma San Diego ua amata ona fa'atutu pa sima a Donald Trump e tuaoi ai Mexico ma Amerika.

Na tapunia aloaia le fonotaga i le taeao o le Aso Sa, ona amata ai lea ona tatala le filialii ma toe sauni sui usufono e fo'i. O usufono mai Ausetalia ma Niu Sila, na muamua malaga ese ma Amerika e fa'atatau i avanoa o vaalele, ao usufono mai Samoa – sa mapu ane i le Susuga i le Faifeau Toeaina o Makerusa ma le faletua o Faatea, ma sa talimalo ai le aulotu i San Diego mo aso e 4, ona malaga ae ai lea i luga i Kalefonia i le Susuga i le Faifeau Toeaina o Andy ma le faletua aemaise foi si a la aulotu, e faatali ai le taimi o le vaalele mo Samoa.

UPU FAAFETAI

Ia avea au e fai ma sui o le Afioga i le Peresitene ma le mamalu o le au usufono, e faaleoina atu ai le Agaga o le faafetai ma le faamalo.

Ia avea ia le Sulu Samoa, e auala atu ai se faafetai ma se faamalo i le Ekalesia Aoao lau Afioga i le Ta'ita'ifono ma le Laulau a le Fonotele, lau Afioga i le Ta'ita'ifono o le Komiti o Tamā o le Ekalesia, le paia o le Au Faigaluega, o tupu ma e'e o le Ekalesia Faapotopotoga Kerisiano Samoa, aemaise le tapuaiga a nai a matou aulotu. Faafetai tele mo a outou talosaga aemaise foi lo outou maau e ala i seleni sa fa'atinoina ai le usugafono. Faafetai, faafetai tele lava.

Faafetai lau Susuga i le Faifeau Toeaina Makerusa ma le faletua ma le aulotu i San Diego, faafetai le agalelei i le usugafono. E le faagaloina le alofa o lau Susuga i le Faifeau Toeaina Andy Leavasa ma le Faletua aemaise le paia o le lua Ekalesia i le fa'aavanoaina o lua maota e mapu atu iai le au-usufono e leai ni aiga i Amerika. Faafetai foi i le Pulega a Amerika Tutotonu ia outou susuga i faafeagaiga ma faletua, susuga i aoao ma tiakono, faatasi ma si tamā Penisione ia Liki Tiatia. Faafetai, faafetai alofa – ia toe faatutumu atu e le Atua mea ua fa'agaogaoina ona o le usugafono a le Komiti. E moni ai lava saunoaga a lē e ana le Au Taumafai. “*A outou ō malaga, aua le so'ona avea ni ofu, aua e te popole i lau ato tupo, ae o mai e ō o loo iai tagata i le ala e alolofa ane ia te outou.*”

Ia manua le alo faiva o le Ekalesia ma le sauni atu i le Fono Tele i Malua.

Soifua

Failautusi o le Au Taumafai

Rev. Siolo S. Tauati (FT)

ARETO MO LE AGAGA

O FEA LE ITU E TE I AI?

E iai pea lava se autau o mea moni, e iai pea foi ma se autau o mea sese. O lē fea o ia itu e te i ai? Afai e te lē o i le isi itu, o lona uiga o loo e iai i le isi itū. E te lē mafai ona faapea e te le auai.

E te alofa i le lalolagi ma inoino i le Atua ma ona tagata, po o e te alofa i le Atua ma ona tagata ae e te inoino i le lalolagi?

Ua faapea mai Ioane: “Pe afai e mamao se tasi i le lalolagi, e lē o ia te ia le alofa i le Tamā. Auā o mea uma lava o i le lalolagi, o le tuinanau o le tino, ma le tuinanau o mata, ma le faalialia o lenei olaga, e lē mai le Tamā ia, ae mai le lalolagi.” (I Ioane II: 15 – 16). Sa

fetalai atu foi Iesu i ona so’o: “Afai e inoino mai le lalolagi ia te outou, ua outou iloa ua muamua ona inoino mai ia te A’u, i lona inoino ia te outou. E lē ni ō le lalolagi outou, a ua ou filifilia outou mai le lalolagi, o le mea lea e inoino ai le lalolagi ia te outou.” (Ioane 15: 18 – 19).

O i ai le mea matautia i le olaga o le to’atele o Kerisiano, o e ua filo fa’atasi lo latou olaga ma le lalolagi. O le a lena mea? Ua fa’ale lalolagi. O lea ituaiga o Kerisiano, ua ia le faapupulaina atu lona malamalama, ma o le iuga o lea mea, ua le mafai e le tagata asagala ona ia iloa ana agasala.

Peitai, o i latou o ē ua mulimuli atu ia Iesu ma le faamaoni ma le loto atoa, ua faaali atu a latou agasala, aua ua ia i latou le malamalama o le lalolagi o loo pulea ai o latou agaga ma o latou olaga. O iai le eseesege tele lava i le va o amioga ma faiga a ē ua faaolaina, ma ē e le’i faaolaina, ma ua iloa lelei lava e i latou ua le’i faaolaina le sese o latou ala. “Auā o le nanamu i matou ia Keriso i le Atua i ē faaolaina, atoa ma e o malaia; o le manogi o le oti e oo le oti i nisi, ao le manogi o le ola e oo le ola i nisi.”

O LE FEA ITU E TE IAI?

Tusia: Iosefa A.Uilelea. (FT)
EFKS Lotofaga.

O LE A EA LE FAA-KERISIANOINA?

1. I totonu o le agia, o le AGALELEI.
2. I totonu o se galuega, o le FAAMAONI
3. I totonu o se sosaiete, o le FAAALOALO
4. I le faafesagai ma le tagata solitulafono, o le FAAMAGALO
5. I le faafesagai ma le tagata vaivai, o le FESOASOANI.
6. O LE A EA LE FAA-KERISIANOINA? I le ola ua pulea e le agasala, o le SALAMO.
7. I le ola ua pulea e le Atua, o le TUMAU

Tusia: Iosefa Uilelea (FT)
EFKS Lotofaga.

FA'ASOLOGA FONO TELE 2019

MALUA, ASO 13 - 24 ME

“FA’AALIGA O LE MANA O LE SILISILI ESE”

“Revealing the Power of the Most High”

(*Tanielu* 7 : 18)

	6.00pm	LOTU AFIAFI <i>Ta'ita'i: Tu'uau KFE Tu'uau FS</i> LOTU AFIAFI <i>Ta'ita'i: Harima Le Mamea FS</i>	Fale Iupeli <i>Apia</i> Fale o Tina <i>Apia i Sasa'e</i>
<u>20- 24, USUIA LE FONO TELE</u>			
ASO GAFUA 20/05/19	7.30am	Tapuaiga Amata Ta'ita'i: Senara T. Senara FT Pepa: Arthur Wulf (FS) Amata Taualumaga o le Fono Tele. Malologa mo Taumafataga o le Aoauli. Faaauau Taualumaga o le Fono. Malolo le Fono	(Taitaifono) <i>(Kolisi Faafaifeau Malua)</i>
	8.00am		
	9.00am		
	12.00pm		
	2.30pm		
	5.30pm		
ASO LUA 21/05/19	7.30am	Tapuaiga Amata Ta'ita'i: Kerisiano Soti FT Pepa: Lance Tautiepa FT Taualumaga o le Fono Tele. Malologa mo Taumafataga o le aoauli. Faaauau Taualumaga o le Fono Malolo le Fono Pesepesega & Siva Faaleagaga	(Penisione) <i>(Au Toeaina)</i> <i>(Autalavou Tafuna)</i>
	8.00am		
	9.00am		
	12.30pm		
	2.30pm		
	5.30pm		
	7.00pm		
ASO LULU 22/05/19	7.30am	Tapuaiga Amata Ta'ita'i: Maafala Lima FFA Pepa: Terri Slade Taualumaga o le Fono Tele SAUNIGA ALOAIA AU PENISIONE (Fale Iupeli) Ta'ita'i: Tunumoso S. Iosia FT Faaauau Taualumaga o le Fono. Malolo le Fono.	(Pule Kolisi Malua) <i>(Mafutaga Tina)</i> <i>(Sui Taitaifono)</i>
	8.00am		
	9.00am		
	11.00am		
	2.30pm		
	5.30pm		
	7.30pm		
ASO TOFI 23/05/19	7.30am	Tapuaiga Amata Ta'ita'i: Solomona Tuatagaloa FT Pepa: Vaatiuola Lautolo TT Taualumaga o le Fono Tele Malolo mo Taumafataga o le aoauli Faaauau taualumaga o le Fono Malolo le Fono Feiloaiga Au Toeaina & Aufaigaluega Faifeau	(Penisione) <i>(Tiakono)</i>
	8.00am		
	9.00am		
	12.00pm		
	2.30pm		
	5.30pm		
	7.30pm		
ASO FARAILE 24/05/19	7.30am	Tapuaiga Amata Ta'ita'i: Senara T. Senara FT	(Taitaifono)
	8.00am	Taualumaga o le Fono Tele	

TAUALUMAGAO LE FA'ASOLOGAO LE FONO TELE:

- 1 Faamaonia Iugafono Fono Tele
- 2 Mau Tuu Sao mai Matagaluega
- 3 Mau Tuu Sao mai Komiti Tetele e Ono a le Ekalesia
- 4 Faamaonia Galuega a Komiti
 - i. Komiti o Tupe
 - ii. Komiti o Feau Eseese
 - iii. Komiti o Aoga
 - iv. Komiti o Atinae
 - v. Komiti Faamisionare
 - vi. Komiti Au Toea'ina
- 5 Palota Failautusi Aoao
- 6 Palota Sui Taitaifono

FAILAUTUSI

ITULAU MO TUPULAGA TALAVOU

Muamua Fanau i le Tupu a'e ai Fanaufouina i le Agaga A'oa'oga e taiala i le toe fanau fouina o oe ma a'u.

1) Fanaufouina i le Agaga Fou
Esekiel 36: 26 – “Ou te avatu foi ia te outou le loto fou, ma ou tuu i totonu ia te outou le agaga fou, ou te aveese le loto ma'a a ai o outou tino, ma ou avatu ia te outou le loto aano.

2) Amata mai le Atua.

Ioane 1: 13 – “O i latou e le o le toto na fanau ai, e le o le manao foi o le tino, e le ole loto foi o le tagata, ao le Atua lava.”

3) Manaomia le loloto o lau vaai faale Agaga

“Ua tali atu Iesu ia te ia, “E moni e moni ou te fai atu ia te oe, a le toe fanau le tagata, e le mafai ona iloa e ia le malo o le Atua.

O lē ua fanau mai i la le tino, o le tino lea, o lē ua fanau mai foi i le Agaga o le Agaga lea.

4) Avea ma tagata fou

2 Korinito 5: 17 – “O lenei, afai o ia Keriso se tasi, o le tagata fou ia, ua mavae le ola tuai faauta, ua oo mai le ola fou.

5) Ua tatou maua le faaolataga

Tito 3: 5 = Iesu – “Ona faaola mai ai lea ia i tatou, e le ona o galuega o i le amiontonu sa tatou faia, ae tusa ma lona lava alofa i le faataeleina i le toefuataina ma le faafouina e le Agaga Paia.

6) Faatonuina mai e le Upu a le Atua (Tusi Paia)

1 Peteru 1: 23 – “Ua fanaufouina outou e le o le fua e pala, ao le fua e le pala lava, o le Afioga a le Atua lea ua ola ma ua tumau e oo i le faavavau.

7) O lou toe fanaufouina ma le suia a lou olaga e maua lea i lou “Faatuatua” ia Iesu Keriso ma le loto faamaoni atoatoa.

1 Ioane 5: 1 – “O i latou uma o e talitonu, o Iesu Keriso lava lea, ua fanau mai i latou mai le Atua, o i latou uma foi o e alolofa i le ana le fanau e alolofa fo i latou i lana fanau.

E tatau ona suia le olaga ae aua e te fia malosi aua e leai se tasi ua paepae ma le amio i luma o le Atua.

O oe e te lelei ai, o oe foi ete malaia ai.

Tusia:

*Solomona Tuatagaloa
Faifeau Toeaina Penisione
Malolo*

6. Molimau pepelo ma le tautala pepelo i mea pepelo-
Faataoto 12:17 “Ole tautala faamaoni ua fa'aalia mai e ia le tonu a'o le molimau pepelo ua faaalia mai e ia le fa'aoleole.”

O le mea pito sili inosia e le Alii.

7. O le na te faatupuina le maseiga i uso- Faataoto 16:28 “O le tagata faapiopio e faatupuina e ia le misa ma le faatuatua na te faateaeseina uo. Faataoto 6:14 “Ua i lona loto le faapiopio, na te fai togafiti leaga i aso uma na te faatupuina maseiga.”

Tusia:

*Solomona Tuatagaloa
Faifeau Toeaina Penisione Malolo*

MEA UA INOSIA E LE ATUA

Faataoto 6: 16 - 19

V16- “O mea nei e ono ua inosia e le Alii, o lona fitu foi ua matua inosia lava e ia.”

1. **Mata faasiasiā** - Fia tagata loto faamaualuga, fia sisi i luga le isu, fia aulelei (Faataoto 16:18)

1. **Laulaufaiva pepelo** - Faataoto 12:22 “E inosia e le Alii o laugutu pepelo, ao e fai mea faamaoni e fiafia iai o ia.

3. **Lima e sasa'a le toto o le ua le sala (Fasioti tagata)** - Salamo 5:6 “E fano ia te oe o e tala pepelo, e mata'u i le Alii le tagata ua toto lima ma le tauoleole.

4. **Loto faitogafiti leaga-** Loto manatunatu i togafiti leaga. Kenese 6:5 “Ua silafia e le Alii ua leaga tele lava tagata i le lalolagi, o manatu uma ua mafaufau ifo ai io latou loto ua na ona leaga ia i aso uma lava. Mataio 15:19 “Aua e alu ae mai le loto o le manatu leaga o le fasioti tagata, o le gaoi, o le molimau pepelo ma le upu faaleaga.

5. **Vae e tele vave ona taufetuli i le leaga** - Faataoto 1:26 “Aua ua taufetuli o latou vae i le leaga ma faatalise e sasa'a ai le loto.”

ITULAU MO TUPULAGA TALAVOU

Mea e le tumau i le tagata.

E mavae ma le toe iai i se taimi

1. Malosi (Power)

Salamo 37: 35 – 36

V.35 – Na ou iloa atu le tagata amio leaga ua faasauāina, ua faateleina foi o ia e pei o le laau ua tupu i lona lava eelele, ma tauulu ola.

V.36 – A ua mavae ese o ia faauta foi ua leai, na ou sailili foi ia te ia, a ua le iloa lava.

2. O le ola (Life)

Salamo 90:10

O tausaga o matou olaga e fitugafulu ia tausaga, ae afai e valugafulu tausaga ona o le malosi, ao lo latou malosi o iai le tiga ma le puapuaga, auā e vave ona mavae atu ia, ma matou lele ese.

3. Mea faitino o le olaga (Material Things)

Salamo 102: 25 - “O anamua na e faavaeina ai le lalolagi, o le lagi foi o le galuega lea a ou aao.

Y26 – E faaumati ia mea ao oe e te tumau pea, e pala ia mea uma e pei o ofu tele, e te liua ia e pei o le ofu ona liua lava lea.

4. Fiafiaga o le olaga

Luka 12: 19 – 20

V.19 – “Ou te faai ifo foi i lou agaga, Lou Agaga e, ua ia te oe mea lelei e tele ua teuina mo tausaga e tele, ina nofonofo filemu ia, ina ai ia, ma inu ma e olioli.

V.20 – A ua fetalai atu le Atua ia te ia, O oe na le vale, e aamuina

atu lou agaga nai ia te oe i le po nanei ae fai ma ai mea ia ua e saunia?

5. O le atamai ma le iloa.

1 Korinito 13:8 – “E le uma le alofa, ae pei ni perofetaga, o le a faaleaogaina ia, pei ni gagana o le a mavae ia, poo le iloa o le a faaleaogaina lea.

6. O le mamalu faale lalolagi

1 Peteru 1: 24 – “Auā o tagata uma lava e tusa ia male mutia o le matagofie uma foi o tagata e pei o le fuga o le vao, e magumagu le mutia, e toulu foi ona fuga.

O ia lava mea uma e faaleleia le tagata, i le olaga a ia manatua, o mea e le tumau e le fai pea mo oe e mavae ma o ese atu, ae foi le tagata i le eelele aunoa ma se mea e te alu ma oe. Tatou iai i le lalolagi e le ina ia lapopoa ma aulelei ma fiafia i aso uma, ae ua e i le lalolagi e saunia ai oe mo le ola faavavau.

Tusia:

Solomona Tuatagaloa

Faifeau Toeaina Penisione Malolo

malamalamama se tagata ma atoatoa i le gagana, e maua le to'afilemu ma le lototeli e tautala atu ai, ma fa'afesaga'i pea ma tagata.

Manatu 2: “...ona faaali atu lea ia te i latou o ona lima ma lona itu. Ona olioli ai lea o le au so'o ina ua latou vaai atu i le Alii.”

O loo manino lelei iinei le suiga o uiga o le au so'o, mai le fefe ma le palaa i le olioli. Ua tafiesea e le Alii Toetu lagona vaivai o le tagata, ma ua toe faafoisia le malosi i lona au soo. O ona aao mafola na tutui ai fao, ma lona itu sa afāina i le ma'ai o le tao, lea ua vaai tino i ai le au so'o, ona tupu ai lea o lo latou olioli.

O le taunu mai o le Tala Lelei i lo tatou Atunu, o se tulaga e ofo ai le mafaufau. Auā e ui o Misionare papalagi na latou tala'i maia, a o nai tuaa lava ma matua ua mou atu lo latou

(faaauau itulau 14)

PEPA TUPULAGA TALAVOU

MATAGALUEGA HAWAII

Pepa Fono Tele 2018

ai e le Ekalesia ona maopoopo, ma mautu ana galuega fai mo le Talalelei male agai atu i le lumanai. Peita'i, o lo tatou gagana foi lena, ua peiseai ua fai ma ala ua matou fefefe ai. O le tele o taimi ua matou lalafi ai ona o le palaaai i le Ekalesia. E i ai pea le mitamitaga, o i matou o tagata Samoa, auā o lo tatou tofi faatasi lena mai le Atua. Ae paga lea, ua vaivai-a-lima i matou i la tatou gagana.

E matagofie se Tala nai le Sulu Samoa, i le masina o Tesema 2017; o se finauga a Tupulaga Talavou e faatatau i le ulutala – “Ua tele le Mativa ona o mea fai a nuu ma Ekalesia”. O Susuga ia Renny Utufua Naseri, o Eletino Tiiti, ma Simeanamulu Lalotoa Fiti, o le

Autalavou EFKS a Apia, na latou matua tete'e i lea mataupu. Ae na taua i le saunogaga a Renny, e faapea, “E tele ituaiga mativa. E iai le mativa i le tamaoaiga fa'aletino, e i ai le mativa fa'aleagaga. Ae i ai foi i si ituaiga mativa .” (itulau 2 Sulu Samoa, Tesema 2017).

A ua matou fia fa'aopoopo i lea saunoaga taua, se manatu – E i ai ma le mativa i le Gagana. Ua matou lagonaina, o le lē atoatoa o le tautua a Tupulaga i le Atua e ala i le Ekalesia, ona ua matitiva i le gagana. Atonu o le mafua'aga foi lena ua fefefe ai, ma pala'a ai Tupulaga i le Ekalesia, ma ua avea ma ala ua o ese ai nisi. A

PEPA TUPULAGA TALAVOU

MATAGALUEGA HAWAII

Pepa Fono Tele 2018

soifua, na auala mai ai le Tala Lelei, ma ua faigofie ai ona taliaina e o tatou tagata. Atonu o le Agaga o le Atua lena, ua ia fa'aaogaina ai nai o tatou tagata, faatasi ai ma le gagana e momoli mai ai le Tala Lelei i Samoa. O aao mafola ia o Iesu ua ia faailoa mai ai le itu lelei o le Tala Lelei, o lea ua tatou fiafia faatasi ai. Ae sa le faigofie le faatinoga o lenei Tala Lelei, ma le faaoalataga mo lanu ma gagana uma o le lalolagi. Ina ua mautu mai le Tala Lelei i Samoa, ona ae lea o se tofa i o tatou tagata, ina ia faasalafa, ma faasoa atu lenei tala i le atu Pasefika. A o le isi lenei mea e ofo ai, aua o lo latou maelega ma le atamai i le faaaogaina o le gagana sa fai ai le talaiga. I le Fono Tele o le 2017, sa folasia ai e Faiaoga o le Kolisi Faafafeau i Malua nei, le susuga ia Latu Latai, se tala'aga matagofie i le Galuega Faamisionare, a Faifeau ma Faletua LMS Samoa i le Pasefika. O se tala i le aao mafola o ò tatou tagata, i le ofoina atu o le soifua mo le Atua ma lana Tala lelei. "Ai lava sa foliga faigofie ia i latou le ofoina atu o le soifua e tautuina ai le Atua ma lona finagalo; a o le upu moni, sa le faigofie lona faatinoga. Auā o le to'atele o nai tuua, ma matua, Tulou na maliliu ai lava i atunuu ese, ona o le Tala Lelei. Na molimau le Susuga a Latu Latai, i lana pepa:

"O le ulua'i galuega fa'amisionare a Samoa i motu o Vanuatu, Niu Kaletonia ma Motu o Laoiti, o se galuega e pei ona lauga ai Ioane Viliamu sa fa'atali mai ai noanoaga ma puapuaga. I le 30 tausaga sa galulue ai Samoa mai le 1839 seia oo i le 1869, e onosefululua(62) ulugalii Samoa sa galulue ai. Mai lea aofaiga, pe a ma le luasefulu fa (24) faifeau, sefulu (10) faletua ma fanau e toaiva (9) sa faamanuina lo latou maliliu ai. (*itulau 2, "Faalogo i le Agaga o le Atua: O le Galuega Fa'amisionare a Faifeau ma Faletua LMS Samoa i le Pasefika 1839 – 1979.*)

E ui o ia puapuaga ma sauaga, o fita ma faigata sa feagai ma Faifeau Misionare, ma nai o latou aiga, ae sa le fa'atafa ai ona o le momoliga o le

Finagalo Paia o le Atua. O lea ua tatou lagona faatasi ai le fiafia, le olioli ma le mitamita i o tatou loto, ina ua latou faailoa atu i le lalolagi le Aao Mafola, le Aao Laveai, male Aao Faaola o Iesu Keriso.

Manatu 3: Ona toe fetalai atu lea o Iesu ia te i latou, "Ia outou manuia. Fa'apei ona auina mai o a'u e le Tamā, e faapea foi ona ou aauina atu outou."

O le faamanuia a le Alii o Iesu i ona so'o, o se aga masani lava o le aganuu faa-Iutaia pe a feiloa'i. A 'ona ua faalua iinei ona faamanuia mai le Alii, ua mautinoa ai le taua tele o lona au soo i lona finagalo. Aemaise o le galuega fa'aauau o le a auina atu i ai i latou. O le ata lea ua maua iinei. O se Ta'ita'i ua toe fa'amausali lo latou so'otaga ma ona so'o; O le au so'o ua toe fa'afosisia le Tumu o le Faatuatua, ina ua fa'amanuia mai lo latou Ta'ita'i. O lea ua mautu mai le Tala Lelei i la tatou Ekalesia, e ala mai i Misionare, aemaise o nai o tatou lava Tagata Samoa Faatuatua, na fai foi ma Misionare ma auina atu mo le Tala Lelei. E oo mai i nei onapo, matou te manatu – o loo gafa pea le Ekalesia Faapotopotoga Kerisiano Samoa, ma le Auina atu lea na fetalai i ai Iesu. E le ina ia faamautu le Tala Lelei, ae ina ia mautu atili le Tala Lelei, e ala i le Atamai i Gagana, aemaise la tatou lava gagana Samoa. O le upu moni lava, o loo moomia pea e Tupulaga o le Ekalesia le saga a'oa'oina o le Gagana, o Tu ma Aganuu aua le Talalelei; aemaise i tupulaga Talavou i fafo atu o Samoa, e aofia ai ma Hawaii. O le una'iina oni galuega lelei, ma le faaolaola i le gagana e le Ekalesia, e ono fesoasoani tele.

I sa matou suesuega na faia, na fulisia lava Tupulaga i le fa'aaogaina pea o le Gagana Samoa i Tapuaiga ma Sauniga i Aso Sa. Tau lava ina faamalamalama foi i sina faa-Peretania ina ia latou iloa le feau o loo fia momoli mai. E fulisia foi ina ia faataua pea Tu ma Aganuu Samoa, aua o lo latou faasinomaga lea mai le Atua. Pau lava o lea, ia maua le onosa'i e le 'au

matutua e fa'amalamalama ai i latou. Aua ose lagona e ootia tele ai le loto, ina ua taua o latou o Samoa, a ua vaivai le faatino i le tulaga tonu faa-tagata Samoa. E le o se upu avane ai, le gapatia pea o si a tatou Ekalesia i le fa'amautuina ma le fa'amamaluina o le Faa Samoa. Ole Gagana tautala ma le faamaumau, o Tu ma aganuu faatino, na pei lava o ni mea paia i Tuua ma Auga Tupulaga ua tuana'i. Atonu sa o latou talitonu lava, o le faamanuiga mai le Alii le gagana, e tatau ona a'oa'oina lelei ma fa'apelepele i ai, aua le Tala Lelei.

Upu Faaiu:

E le taumasina so matou lagona, ma se tofa i le Ekalesia. A ua na o se tuualalo a Tupulaga mai Hawaii.

"O Tupulaga – o le Auina Atu a le Ekalesia." E auina atu mo le Tala Lelei, ma le faaaauauina o feau a le Ekalesia i le lumana'i. E tatau ai ona auina atu ma le Atamai, ma le Lototele, ma le Manuia, i le Ola Fou faa-le-Agaga.

E moomia pea ni sootaga lelei o faamanuiga mai i Taitai o le Ekalesia mo ana Tupulaga, ma ia faatumauina pea le Ekalesia i lona Tofi- o le a'oa'o atu o le Gagana. Ina ne'i faavaivai, ona milosia faatasi lea o Tupulaga, ile malolosi o le mau gagana o nei onapo, i le fa'a-initaneti ma le atamai fa'a-tekenolosi.

O loo fa'amauina foi e Ioane le tula'i o le Alii Toetu i le ogatotonu, ua manava atu ma faapea Ia outou talia le Agaga Paia. Ioe le Ekalesia e, o le Ola Fou lava lea ua manava atu i lona au soo. E pei ona fa'aatoatoaina le tagata, ina ua manava i ai e le Atua le manava ola i ona pogaiisu, ma maua ai le Ola Fou. Matou te talitonu, ua manava mai le Keriso o loo tula'i pea i le ogatotonu o le Ekalesia ma ana Tupulaga. A ta'ape lenei fono Tele, ma foi atu Usugafono uma, ia avea lava o nisi ua Auina atu ma le atoatoa i le Ola Fou, ma Faamanuiga mai le Alii o Iesu Keriso, le Ao o le Ekalesia.

Soifua ma ia Manuia. Aloha

O E UA FAI'ILAGI LE FOLAUGA

**Rev Elder Mafi
Oloapu**

Na tu'umalo le Susuga i le Toeaina malolo manumalo pe tusa o le 6pm i le afiafi o le Aso Sa 10 Setema 2017 i le maota gasegase o le Malo i Moto'otua, i le tuana'i ai o nai vайaso talu ona fa'ata'otolia. E maliu le tamā, ae ua 74 tausaga o lona soifua.

Na faia lona Sauniga Faaleaiga i le Aso Sa 17 Setema 2017 i le malumalu na ia galue ai i tausaga e tele, le malumalu o le Eklesia i Loimata o Apaula. Na ou ta'ita'iina lea Sauniga, tatalo le

Susuga Fa'aaliga Auvele (AM), faitauina le Tusi Paia e le Susuga Tagaloa Aolele Godinet (AF), ae lauga le Susuga Aokuso Lee (FS).

O lona Toe Sauniga na ta'ita'iina e le Susuga i le Faifeau Toeaina Auva'a Peseta, o tatalo na saunia e le Susuga Ioane Petaia (FS), faitauina e le Susuga Apelu Pula (FS) le Tusi Paia, lauga le Susuga Faasalafa Vitaoa (FS), ae ou saunia le molimau faaleagaga ma tuuina ifo lona tino i le tuugamau.

O le Susuga Mafi Oloapu ma le Faletua o Nele Oloapu, o le ulua'i faifeau lea i lenei Aulotu i Loimata o Apaula; ma e pau foi lea o le aulotu na galulue ai ina ua i'u mai Malua. Na osi le feagaiga ma le

**PAULI
SAUMANI**

Tiakono

09 Ianuari 1947 - 13 Me 2018

O le tamā ia Pauli na soifua mai i le aso 9 Ianuari 1947 ae na valaau le Atua ma fa'amanava feau i le aso 13 Me 2018 ina ua 71 tausaga o le matua o le soifua. E ui o vaítau o le fiafia i malologa i le fa'atauaina ai o le sao o tinā i aiga, nuu ma eklesia, aemaise ai foi o le gasolo ai o le fono tele a le eklesia, ae ua ufitia ai le tinā ia Ake ma le fanau ma le aiga i le valaau a le Atua i le tamā.

O ona toe sauniga sa faia lava i le aso 30 Me 2018 i lana eklesia pele sa tautua ai, EFKS i Laulii. O au lava sa ta'ita'i ma fa'aulufaleina le sa o le tamā, ole susuga ia Olive o le faifeau Asofitu o le toe afio mai na saunia talosaga, ae o le Susuga i le toeaina o le Eklesia Faapotopotoga a le Atua ia Patolo Matalasi na saunia le upu fa'amafanafana mo le tinā ma le fanau ua tu'ua.

O le tinā ia Ake na molimau i le mafutaga ma le tamā ua savalia le 52 tausaga, o se mafutaga sa mafanafana i le alofa, ma o lea foi le molimau a le tama'ita'i ia Lesina Pauli sa fai ma sui o le fanau. O le afioga i le Fa'amasino Samoa ia Tauiliili Sekuini molimau e fai ma

aulotu i le Aso 30 Tesema 1987, ae tatala i le Aso 02 Juni 2013 ina ua atoa tausaga e 70 o le matua o lona soifua, ma penisione malolo ai. Peita'i, talu ai ona ua se'e atu i la'ua ina ua malolo i si o la fanua i Vaea e tua'oi lava ma le nu'u nei, o le ala lea na faaauau ai pea ona galulue i lenei Aulotu. Lona uiga e faatofa mai le tamā, ae ua atoa ai le 30 tausaga talu ona galulue i le Eklesia i Loimata o Apaula; e 26 tausaga na avea ai ma faifeau, ma le 4 tausaga na galulue ai o ni mātua penisione. E manatua pea lenei tamā i totonusi o lenei galuega, sa ia tautiga ai mo le Talalelei a Iesu.

O la a le Aposetolo o Paulo, "Amuia e ua oti, oti o i le Alii!" Tuuina atu ma le faaaloalo,

**Rev Letupu Matautia
FAIFEAU TAUSINUU
EFKS Loimata o Apaula**

sui o le aiga o Ake ae o le susuga i le A'oa'o Fesoasoani ia Toloa Tuautu Kalepo fai ma sui o le aiga o Pauli ae o a'u lava sa saunia le molimau fa'a-le-agaga. O loo maua i api o le galuega na papatisoina le tamā ia Pauli i le aso 26/10/1947 e ona matua ia Lafaele ma Suaava. E lei maua le taimi na au sailili ai ma fa'aofia ai i le eklesia ae ua maua ile lisi o tagata eklesia amata mai le tausaga e 1976. O le aso 26/12/1993 na taliaina ai i le filifiliga a le eklesia le fai ai ma tiakono, ae o le potopotoga i le aso 29/12/1993 na faapaiaina ai lo la tofi tiakono. Na ma taunu mai i le tausaga e 2005 o taofia lona tiakono ae na matou toe fa'ae'etia lona tofi i le aso 7/8/2005. O le tausaga e 2009

O E UA FAI'ILAGI LE FOLAUGA



PAULI SAUMANI

na usufono fa'aleoleo ai, ae na tofia e fai ma tiakono usufono i le tausaga e 2013, peitai e lei taunuu

ina ua tuua le malo e le afioga ia Leniu Avamagalo. O se tamā foi e galue malosi, ma e faaali lava lona le fiafia pe a iai ni mea e le talafeagai foi ma lana silasila. O nisi taimi e sili ona manatua ai lenei tamā o lotu e fa'auma ai le tausaga, ma lotu talosaga o le amataga o le tausaga. E fiafia lava e tulai e faailoa lona agaga faafetai i le Atua ma lona alofa ia i tatou. O lana pese lava e fiafia e usu i ia lotu o le tausaga o le pese e 146, 'po ua e mau tofi i le malo....."

O au lava foi na fa'aiuina ona sauniga i lona oliolisaga tumau ma fa'ai'u ai i le pese fa'atofa a le au Kerisiano.



**Rev Elder Mafi
Oloapu**

Manuia lau malaga tamā

Saunia:

Pita Toleafoa(FS)

EFKS Laulii.

Faletua Matagaluega Vitoria



KnS Photosuite